

Warqad Furan III: Arligu Waa Dhaxalkeygee, Hayga Iibin Awoowe!

W.Q: Inj. Maxamed Cali Cibaar

Qoraalkani wuxuu ka tarjumaya dareenka danyarta iyo dulmanayaasha Soomaaliyeed ee maanta ku ildaran dalka Soomaaliya gudahiisa iyo dunida daafaheedaba. Qoraalku wuxuu si gaar ah uga warramayaa duruufaha ku xeeran carruurta agoomaha ah ee aan lahayn ehel u gargaara, nasiib-darrana ay ka sii jeedaan indhaha inta wax haysata. Qoraalku wuxuu soo gudbinayaa farriin ku socota dadka isku boqray hoggaanka ummadda, ama “siyaasiyiinta” sida badanaaba loo yaqaanno, kuwaas oo in badan oo ka mid ahi ay howl ka dhigteen dibindaabyada dadka ay sheeganayaan in ay metelaan mas’uulkana ka yihiin.

Warqaddan furan oo ka timid agoonka magaciisa la yiraahdo Dulmane Daacad, wuxuu u dirayaa awowgiis Dagane Danmooge oo ka mid ah kuwa horboodaya oo wax ka maleegaya dabinnada lagu dibindaabyeynayo dadka Soomaaliyeed, waxayna warqaddu u qorantahay sidan:

Ka: Dulmane Daacad
Xaafadda: Danyar
Magaalada: Dayacan
Dalka: Soomaaliya

Ku: Awoowe Dagane Danmooge
Xaafadda: Loo Daran
Magaalada: Dulman
Dalka :Soomaaliya

Taariikh: 15-07-2006

Bismillaahi Raxmaani Raxiim,

Awoowe Dagane,

Salaan ka dib, waxaa mahad leh Rabbigii ii suurto geliyay inaan warqaddaan kuu soo diro annagoo aan muddo dheer kala warhelin. Waan la socdaa inaad mashquul aad ugu tahay howl adduun iyo siyaasadda ceynwareegtay ee Soomalida maanta, waxaanse rajeynayaa inaad heli doonto firaaqo yar oo aad warqaddaan ku aqriso ugu yaraan hal mar. Fadlan Awoowe arrintaas ku dadaal haba ku dhibo aqriskuye.

Awoowe Dagane,

Waxaan kuu hayay, walina kuu hayaa ixtiraam waalidnimo iyo qaddarin weyn. Laakiin nasiibdarro dhankaada iima haysid wax naxariis ah, mana fahamsani sababtaas! Waxaa ii muuqata in aadan kala jecleynba in aan caafimaad qabo iyo inuu cudur i hayo. In aan qaawanahay iyo in qeyd aan cawrada ku dado aan haysto. Awoowe, xaggeed igu ogayd nolol iyo geeri? Ma ka warhaysaa meesha ay ku



dambeyeen Aabbe Abshir (Daacad), hooyo Asli (Caato) iyo labadii walaalahey ahaa ee iga waaweynaa, walaalkey Axmad iyo walaasheey Ayaan ?

Awoowe Dagane,

Warqaddan kuuguma soo dirin in aan deeq iyo daryeel kugu weydiisto Daa'in baa deeq iyo dulqaadba lehe. Waxaan rabay oo kaliya in aniga oo matalaya inta danyarta ah ee ila dulman aan adiga iyo saaxibbadaada aad isku doonta saarantihiin idiin soo gudbiyo codsi ka tarjumaya guud ahaan dareenka dulmaneyaasha Soomaaliyeed, gaar ahaanna carruurta agoomaha ah ee aan ku wada hoyanno darbiyada dundunsan ee magaalada Dayacan.

Awoowe Dagane,

Waxaan kula socodsiinayaa in maanta aniga iyo malaayiin Soomaali ah oo ku dhibban dalka gudhiisa iyo dibaddiisuba dhaxalka kaliya ee aan gacanta ku haynaa uu yahay DHULKA SOOMAALIYEED oo waliba hadda kala dhantaalan. Awoowe, af-kalaqaad iyo amakaag ayay nagu noqotay markii aan maqalnay in adinkoo sheeganaya mas'uuliyiin ummaddeed muddo dheer oo aad hurineyseen colaado-sockete ka dib ay haddana idinla qummanaatay inaad dhuuni dhaafsataan dhulkeennii Rabbi dhaxalka noo siiyay ee qarniyo badan dhiigga loo soo huray sidii loo difaaci lahaa, cadowyada duullaanka ku ahna looga yureyn lahaa.

Awoowe Dagane,

Sidaad la socotaba qaarkiin waxay qaybo dhulkeenna ka mid ah ka kireeyeen shirkado iyo dowlado burcad ah oo dhulkaas si dadban loogu xalaaleeyay. Qaarkiin waxay dhulkeenna berrigiisa iyo baddiisaba ku duugeen sun halis ah oo aafadeeda leh, adduunyaduna iska soo fogeysay. Qaar ayaa dab qabadsiiyay dalag iyo duurba oo deegaankii ka soo reebay dogobyoo dhuxul ah oo ay dalal shisheeye u dhoofiyaan. Qaar kalena waxeyba si aan gabbasho lahayn u go'aansadeen in ay ciidan cadow noo gacan-geliyaan iyagoo u xilanaya ceesh aan ka badnayn wax maalmo caloosha lagu cabbeeyo, ceebta Alle (SWT) ha asturee!

Waa yaabe awoowe, haddii aad dhulka naga xaraashtaan, annaga haba na xaaleynina, dadnimo kalena ha xeerinninee, adinka xaggee idiin degaan noqoneysa? Maxaad kula collowdeen dhulkiinna iyo dhashiinna? Maxay idiin dhimeen? Ma illowdeen in Alle iyo umaddiinnuba ay idinla xisaabtami doonaan, wixii aad geysateenna la idinka abaalmarin doono?

Awoowe Dagane,


Ugu dambeyntii, aad ayay ii xanuunjineysaa in aan kaaga sheekeeyo xaaladda aan hadda ku noolahay, meesha uu reerkeygii - Abbe, hooyo, walaalo- ay ku dambeeyeen, iyo hadda sida uu dareenkeygu yahay. Hase ahaatee anigoo soo koobaya ayaan isku dayayaa in aan dareenkeyga ku muujiyo geeraarkan hoose oo aan Alle(SWT) ka rajeynayo in shimbirka farriin-wadaha ahi uu kugu soo simo kuna soo gaarsiin doono isagoo badqaba.

Geeraarku wuxuu ku billaabmayaa:

Shimbirkeyga Abwaanow
 Ugaaskii nabadeedoow
 Afhayeenka kan liitow
 Abbaanduullaha khayrkow
 Arraxmaan ha ku daayoo
 Kaama waayo agteydee
 Anigoon ixtiraamka
 Edabtii wax u sheegiyo
 Asluubtiiba hilmaamin
 Awoowahayga habaabiyo
 Odayadaan nasan waayee
 Cadowgu uu ajaraayoo
 Arrinkii ka xumaaday
 Erey yar oon u faraayiyo
 Akhbaartaan degdeggaa
 Orod saaxiib u geeyoo
 Akhrisku kuu ku cuslaado
 U higgadi farriinta
 Ku adkee fahamkeeda
 Ula jeedka dhacsii
 Inkirmaadna ma fiicnee
 Ikhwaanow digiddaada
 Shacabku suu ogaado
 Idilkoodba ha gaartee
 Ogeysiiska ka sheegoo
 Isgaarsiinta ku faafi :



Hal kursi hal qof ka badan ma qaado, Somaaliyey Caqli yeesha
 SOOMAALIDA MAANTA




“ Waa iska xaalad adduunyeey
 Agoon baan ahay maanta
 Aabbihii Abshir Daacad
 Aadaanki salaadda
 Asagoo kallahaayoo
 U ordaaya Masaajid
 Oo istaaqfurulleysan
 Ashadaadna qiraaya
 Qaar isbaaro u taallo
 Oo Ibleysku hagaayo
 Oo alaalex sakhraansan
 Akee ay ku fureenoo
 Afartankii ku dhammaatay
 Amintiina xijaabtay
 Hooyadii Asli Caatana
 Arbacadii kala haadka
 Iyo maati xasuuqa
 Iyadoo afar maalin
 Aan afkeeda wax saarin
 Ajasheedi dhamaatooy
 Umul raacatay baahi
 Alle how naxariisto.



Axaddii Madfac tuurkiyo
Isniintii ka dambeysee
Boqollaalka la aasay
Arabbikhi aan badnayn iyo
Ukun reerka u taallay
Isagoo mid acuuduye
Inkaar qabaa naga booboon
Gaajo sii engegeynoo
Ciddu oon haqaneyso
Walaalkey Axmeddeey iyo
Inantii ka yareydba
Iyagoo biyo raadshay
Aroorkey u baxeen baa
Aragti iigu dambeysoo
Gantaalihii la afuufay
Iney unuunka jareenoo
Ilkii hoose la geeyoo
Ifka ay ka tageenba
Gadaal baan ka ogaaday
Alle how naxariisto.



Ehelkey markaan waayay
Arxan waaban ka quustay
Aroortii ma quraacdo
Ayaan ayaan ma qadeeyo
Cashana waaban illoobay
Adkeysi baan jiscintaayoo
Ilmada aan ku tiraa
Waxa aanse ogsoonay
Hadduu Eebbe yiraahdo
Mar inaan istareexiyoo
Aaggo noo nabadoobay
Intifaacsan dhulkeygoo
Amaah looma baxshaaniyo
Arligu waa dhaxalkeygee
Aakhiraan la hureyne
Ilaahaaga ka yaaboo
Rabbi baa wax arsaaqee
Adigoo anfac raadin
Hayga iibin Awoowe!



Ubad baan ahay yaabban
Adduunkii ku dhibtooday
Abaar tii u darneyd iyo
Cudur oofaha gooyay
Saan u aallo bal eeg
Itaalkeyga bal fiiri
Axe ! meeyay damiirkii?
Aahe, waa ku sidee?
Aqligii ma dhammaaday?
Aawayeey Naxariistii?
Miyaadan aadmi ahayn?

Jirro markey i asiibto
Aasbiriin wax i siiya
Abidkey uma jeedin
Oofwareenkan la taahi
Oohdimaa igu taagan
Araggu weyga xumaaday
Ma awoodo ciyaaroo
Istaaggaan ka dhacaa
Qufac baan uxu leeyay
Xanuunka meel an la aadiyo
Isbitaal ma aqaanno
Uskag shey lala tuuriyo
Calal markaan arki waayo
Arradkaan huwadaayoo
Asturaadba ma haysto

Hadduuse Eebbe yiraahdo
Ixaankii lagu diimiyo
Axaadiisti Rasuulka (SCW)
Mar baa aayadda diinta
Lagu oogi dastuurkoo
Aaran loo gudbayaaye
Amaah looma baxshaan iyo
Arligu waa dhaxalkeygee
Aakhiraan la hureyne
Ilaahaaga ka yaaboo
Rabbi baa wax arsaaqee
Adigoo anfac raadin
Hayga libin Awoowe!



Ileys waa mid aqoone
Ardadoon la sinnaado
Ama aan u horreeyoo
Aan abaalmarin qaatoo
Amiirkii berritooliyo
Ubax laygu misaalo
Waan jaclaa dugsi aadkoo
Alif aan ka billaabo
Illaa aan Injinneeriyo
Dhaqtar loo wada aayo
Ustaad faafin tacliintyo
Noqdo Aw dhiga diintoo
Bulshadiisa iftiinsha



Waase ley eryayaayoo
Oggolaansho ma haystoo
Waxyow soo urayaahi
Ka dhaqaaq agaheenniyo
Aflagaaddiyo caydaa
Ehbin laygu daraayoo
Ma niyeysto albaabka
Hadduuse Eebbe yiraahdo
Aamiintaan ku duceyno
Intuu weyne ajiiboo
Afmiishaarta la buubsho
Indheergarad la tilmaamiyo
Akhiyaartoo hageysa
Mar un bey umaddeydu
Xuquuqdeyda ogaanne
Amaah looma baxshaan iyo
Arligu waa dhaxalkeygee
Aakhiraan la hureyne
Ilaahaaga ka yaaboo
Rabbi baa wax arsaaqee
Adigoo anfac raadin
Hayga libin awoowe!



Oogadeyda rafaadka
 Indhahayga qarsoomay
 Addimadaan qalqaloocdiyo
 Ilkahaan kala jeestay
 Horay looma arkaan iyo
 Wax kalaan u ekaadoo
 Marka aan ag maraayo
 Dadku wey orriyaanoo
 Waa ogaal li' idoode
 Waa addoon xiska beeley
 Yay intaa ku hayaanoo
 Alaab saan ahay tood ah
 Ababin qaar an lahayn iyo
 Ilmahaa igu dheeloo
 Uusey naaxay jugtiisiyo
 Urug haddaan ka badbaado
 Waa Alxamdu-Lillaahi

Hadduuse Eebbe yiraahdo
 Mar bey Eeddiyo Aayo
 Abtigii an tabaayiyo
 Adeeroo is xilqaamay
 Asxaab khayrka u heellan
 Is uruursanayaanoo
 Sida Islaamka dhashooda
 Aayaamaha carrafaad iyo
 Iidda aan farxayaaye
 Amaah looma baxshaan iyo
 Arligu waa dhaxalkeygee
 Aakhiraan la hureyne
 Ilaahaaga ka yaaboo
 Rabbi baa wax arsaaqee
 Adigoo anfac raadin
 Hayga libin awoowe!
 * * * * *

Afrika meeshan ku aallo
 Inaan Soomaali ahaado
 Waan ku faani abkeyga
 Isirkeygii horeeto
 Asaaggiis uma liidan
 Ajnabi soo duldagaayoo
 Oogadooda raraayiyo
 Isticmaarki ma yeelin
 Askarteenni difaaciyo
 Waatii ciidan ammaan
 Shicibkeennu istaagoo
 Akhiyaartu shahiidday
 Maantana waa imtixaane



Waxaan ciilka la ooyay
 Uurku uu I bukooday
 Argagaxoon filan waayay
 Markii qaar ibtilooboo
 Imaankii laga siiboo
 Akhlaaq maafiyo yeeshay
 Qaar dhulkii bar ijaare
 Qaarna uu sun ku aasay
 Qaarna ay ololsheenba
 Qaarna uu alalasoosoo
 Addoonsi baanu rabnaayoo
 Aqbal weeye dheheeniyoo
 Indhosarcaadkiyo beenta
 Ahbal sheekadu moogyay
 Anfariir waxa taagan
 Amakaaggiyo yaabka
 Ayaxaa la wacaayo
 Wuxu eel ka tagaayo
 Aayatiinka dambeetiyo
 Berri aafu dhigaaya
 Hadduuse Eebbe yiraahdo
 Alle Aamin ma iishoo
 Axad Weyne rumeeyay
 Awood looguma faano
 Ilaah baa I abuurtay
 Addoonkiis iga yeeloo
 Addeec waa igu waajib
 Waa Islaam mabda'eygu
 Sidii Imaamki Gureey iyo
 Geesiyaashi adduunkee
 Ableey guusha ku keenay
 Anoo Allaah ku takbiirsan
 Ururradii Danabeed iyo
 Guutooyin baan unkayaayoo
 Axmaqii I haweysta
 Inta aan ul u qaato
 Anigaa eryan doonoo
 Uuleey waa is naqaanne
 Intaan Abeeso na ruugin
 Aan abaabul billaabee
 Amaah looma baxshaan iyo
 Arligu waa dhaxalkeygee
 Aakhiraan la hureyne
 Ilaahaaga ka yaaboo
 Rabbi baa wax arsaaqee
 Adigoo anfac raadin
 Hayga Iibin awoowe!



Arligu waa dhaxalkeygee
Hayga iibin Awoowe!

Rabbi baa wax arsaaqee
Hayga iibin awoowe!

Adigoo anfac raadin
Haygya iibin awoowe!

Ilaahaaga ka yaaboo
Hayga iibin Awoowe!

Aakhiraan la hureyne
Hayga iibin awoowe!

Hayga iibin Awoowe!
Hayga iibin Awoowe!
Hayga iibin Awoowe!

Axe ! meeyay damiirkii?
Aahe, waa ku sidee?
Aqligii ma dhammaaday?
Aawayeey Naxariistii?

Hayga iibin Awoowe!
Hayga iibin Awoowe!
Hayga iibin Awoowe! ”



Awoowe Dagane,

Hilmaan hadal kuma jiree, waxaa halkaan kaa salaamaya asxaabteyda gaarka ah oo aan sawirradooda warqadda kuugu soo lifaaqay ayna ka midka yihiin: Tacbaan, Suuxaaye, Qaawane, Maqadeeye, Miskiin, Luudaaye, Kaneeco, Maahsane, Dhibban, Yaabban, Rajo, Murugo iyo Nafyar. Waxayna leeyihiin:

“ Nagu salaam awoowgaa Dagane, salaanna ha naga gaarsiiyo saaxiibbadiis oo ha u sheego AWOOWEYAASHEEN in ay Allahooda ka baqaan, aakhiro xisaab ayaa jirtee”. Waxaa kale oo ay leeyihiin: “ Dugsasho shisheeye dabeyl kaama celisee, AWOOWEYAASHEEN ha aaminaan dalkooda iyo dadkooda. Annaga ayaa markaannay weynaanno daryeelkooda diyaar u ah, darxumana ma arki doonaan Insha-Allaahu iyagu maanta haba na dayaceene!”. Waxaan leennahay dal barwaaqo ah oo Daa’in nagu manneystay, waxaan wada rumeysannahay Diinta Islaamka oo ah mid aakhiradeenna iyo adduunkeennaba liibaan noo horseedeysa.

Ammaana Allah Awoowe,

Wiilkaadii aad dayacday

Dulmane Daacad

Farriinta Qoraaga

Akhristaha qaddarinta mudanow,

Ujeedooyinka ugu muhiimsan ee qoraalkan laga lahaa waxaa ka mid ah, in il raxmad leh lagu fiiriyo agoomaha dayacan oo aan cidina u maqneyn ceelna u godneyn. Sidaa darteed waxaa si xushmad iyo naxariis leh lagaaga codsanayaa haddii aad karto inaad u istaagto gargaarka agoonta, adigoo ka billaabaya kuwa ehelka ama deriska kuu ah. Haddii aadan waxba u awoodin, fadlan ha ku dhibin dhaxalkooda ee u dhaaf!. U dhaaf fadlan u dhaaf!!! Xusuusnow aqriste in dhaca maal agoomeed abaalmarintiisu ay tahay dhamac naareed oo dhabanka la saaro, Rabbi (SWT) ayaan ka magangalnaye.

Aan u wada gurmanno inta gargaarkeenna u baahan, gaar ahaan AGOOMAHA oo in badan oo ka mid ahi ay maanta dayac iyo dandarro la deris yihiin.

Mahadsanidiin

Inj. Maxamed Cali Cibaar
Delft, Holland

Mohamed_ebar@hotmail.com

Tifaftirka: www.Samaddoon.com

Isha sawirrada : Somalitalk.com + Google.com

Qoraalladii hore ee qoraaga:

[Warqad Furan II : Inta Talo La Hayo, Tabar Ha La Yeesho](#)

[Warqad Furan I : Badbaadiya Bulshada Aad Badbaaddaane](#)

[Ka Diida Bush Dadkeygiyow !](#)

[Wallee La Gadood Ama La Gumow](#)

[Kala Doorashada Kud Iyo Qanje](#)

[Afqalaad Aqoontu Miyaa?](#)

Suugaantii hore ee qoraaga:

[Dabin](#), [Ka diida Buush](#), [Murugo](#), [Damaq](#), [Waajib](#), [Dhalanteed](#), [Dhakafaar](#),
[Gaashaandhig](#), [Dawo](#), [Dadaal](#), [Dulqaad](#),